



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM

Broj: 01-011-466/02

Sarajevo, 17. april 2002.

Z A P I S N I K

sa 24. sjednice Predstavničkog doma Parlamentarne skupštine Bosne i Hercegovine,
održane 17. aprila 2002. godine

Dvadesetčetvrta sjednica počela je s radom u 19,00 sati, odmah poslije završetka 23. sjednice. Prisustvovao je 31 poslanik – iz Federacije BiH 21, iz Republike Srpske 10. Odsustvovali su poslanici Boro Bjelobrk, Sead Buturović, Amor Mašović, Marko Amidžić, Miro Grabovac, Zdenko Vukić, Bahrija Osmanović, Ljubomir Kovačević, Željko Bilbija, Branislav Lolić i Dragi Stanimirović.

Iz Predsjedništva ni iz Vijeća ministara BiH nije niko prisustvovao.

Sjednici je prisustvovao predstavnik OHR-a Jan Piter Hoteldahl.

Predsjedavajući Mirjanić podsjetio je poslanike da je 16 poslanika podnijelo zahtjev za sazivanje sjednice Doma na kojoj bi se razmatralo pitanje implemantacije Odluke Ustavnog suda BH o konstitutivnosti naroda na području cijele Bosne i Hercegovine. Rekao je da je Kolegij prihvatio zahtjev, te je predložio samo jednu tačku dnevnog reda – **Rasprava o toku implementacije Odluke Ustavnog suda BiH o konstitutivnosti bošnjačkog, hrvatskog i srpskog naroda i njihova jednakopravnost na cijelom prostoru Bosne i Hercegovine.**

Dalje je predsjedavajući Mirjanić pročitao imena poslanika koji su potpisali zahtjev za sazivanje sjednice (kasnije došlo do ispravke u spisku, umjesto Halila Mehtića potpisnik je bio Abdurahman Malkić). Zatim je pozvao poslanike da se izjasne o tački dnevnog reda.

Mirko Banjac je zapitao s mjesta – o čemu bi to poslanici raspravljali, na što mu je predsjedavajući odgovorio da su poslanici podnijeli zahtjev u skladu s Poslovníkom i treba da se vidi da li ostaju ili ne pri zahtjevu.

Za riječ se prvi javio Ibrahim Đedović. On je rekao da je zahtjev podnesen prije više od mjesec dana i da misli da je rasprava sada o ovoj temi bespredmetna, s obzirom da se do sutra moraju usvojiti amandmani na entitetske uslove, te je povukao svoj potpis.

Mustafa Cuplov je rekao da u Klubu Stranke za BiH cijene da bi rasprava na ovu temu u ovom trenutku vjerovatno bila bespredmetna i da u tom smislu ima ovlašćenje poslanika Kluba koji su dali potpise na zahtjev, da potpise povuče.

Osman Brka, između ostalog, rekao je da je smatrao i sada smatra da se ni u jednoj zemlji u svijetu o odluci Ustavnog suda ne diskutuje nego se ona sprovodi. On je zbog toga i stavio svoj potpis na zahtjev, da ovaj parlament na tu temu progovori, jer misli da ima šta kazati i da 42 poslanika kao odgovorni ljudi u ovoj državi treba da kažu svoj stav po tom pitanju.

Abdurahman Malkić je, između ostalog rekao da nisu ovim htjeli politizirati slučaj implementacije Odluke, već dati do znanja političkim predstavnicima da oni nemaju osnova ni prava da pričaju o implementaciji Odluke, već odluku donose skupštine entiteta i treba to dosljedno provesti.

Mariofil Ljubić je rekao da je smatrao da ovaj parlament treba poslati poruku da traži provođenje Odluke Ustavnog suda na pravcu pune konstitutivnosti sva tri naroda na cijeloj teritoriji Bosne i Hercegovine. Naglasio je da misli da je to bila obaveza Doma i da iz principijelnih i svih drugih razloga ne želi povući svoj potpis.

Halil Mehtić je rekao da ne može da shvati da ovaj parlament, kao najviše zakonodavno tijelo u državi, nije imao priliku da kaže svoj stav po pitanju Odluke i o aktivnostima koje su vođene prethodnih dana. Odlukom se u određenoj mjeri rješavaju oblici unutrašnjeg uređenje države, a Parlament nije imao priliku da iskaže svoj stav. Održavanje sjednice u cajtnotu na ovakav način je smišljen čin, rekao je, pored ostalog, Halil Mehtić.

Mirko Banjac je skrenuo pažnju predsjedavajućem da je odustajanje jednog broja poslanika broj potpisnika pao ispod Poslovnikom utvrđenog broja, te prigovorio što predsjedavajući dalje daje riječ poslanicima, umjesto da kaže da nisu stvoreni uslovi za održavanje sjednice.

Zamjenik predsjedavajućeg Sead Avdić je skrenuo pažnju poslanicima da je uži Kolegij na početku 23. sjednice saopštio da će 24. sjednica biti održana poslije 23. To znači da je Kolegij, poštujući potpise, otvorio sjednicu i ona je relevantno počela, te da niko ne može zabraniti da se diskutuje o tački koja je predložena. Naglasio je da se slaže sa kolegom Ljubićem i poslanikom Brkom, koji su kazali da ovdje sjede ljudi koji nose stotine hiljada glasova građana ove države. “Predstavnički dom, koji je jedan od najodgovornijih domova u Parlamentu i vrhovna zakonodavna vlast u BiH, šutke je prešao preko Odluke Ustavnog suda i bit će to povjesna greška i propust ovog parlamenta”, rekao je, između ostalog, Sead Avdić.

Franjo Majdandžić je, između ostalog, rekao da nije trebalo otkazivati sjednicu koja je bila sazvana za četvrtak 28. matra, jer četvrtak nije vjerski praznik katolika. Onaj ko ju je odgodio snosi punu odgovornost zašto sjednica nije održana u vrijeme koje bi imalo značaja, kazao je Majdandžić, izražavajući svoje razočarenje i mišljenje da je večerašnja rasprava bespredmetna.

Senad Šarganović je rekao da on misli suprotno, da rasprava nije bespredmetna. Predložio je da Dom usvoji jednu kraću rezoluciju, pa je pročitao tekst prijedloga rezolucije.

Predsjedavajući Mirjanić je konstatovao koji su poslanici odustali, te da je ostalo 10 potpisnika. Dalje je konstatovao da je od 10 prisutno 5 potpisnika. Konstatovao je da sa 10 potpisnika sjednica ima uslove da nastavi raspravu.

Dalje su diskutovali:

Ibrahim Đedović – između ostalog, rekao je da jutros kad je dolazio nije znao da će danas biti 24. sjednica. Naglasio je da u sali nije prisutan niko iz međunarodne

zajednice, niko iz Vijeća ministara i niko od novinara, te je zapitao – kome bi se ovdje nešto pričalo?

Momir Tošić – između ostalog, rekao je da poštuje što je Kolegij ispoštovao poslaničku dužnost da otvori sjednicu, ali kao razumni ljudi odlično znaju kakve zadatke imaju parlamenti Republike Srpske i Federacije BiH. Naglasio je da poslanici nemaju nijedno polazište niti i jedan materijal o kojem bi se raspravljalo, te da bi dalja rasprava bila bespredmetna.

Adem Borić je prigovorio da dosadašnje vođenje Doma danas i način i ambijent koji je stvoren nisu primjermi temama koje su danas bile na dnevnom redu. Zamjerio je predsjedavajućem i Kolegiju na, kako je rekao, lošem vođenju sjednice. Takođe je zamjerio i poslanicima na “neprimjerenom ponašanju danas”. Dalje je, između ostalog, rekao da je namjera Kluba SDA bila da osudi reduciranje Odluke Ustavnog suda i da Dom pošalje jasnu poruku o potrebi njenog punog implementiranja u cijeloj BiH na identičan način.

Tihomir Gligorić je zamolio da se sjednica privede kraju. Između ostalog, rekao je da se pridružuje svima koji su govorili da se sutra to važno pitanje treba riješiti. Uoči toga događaja ovaj dom bi mogao zapasti u zamku politike. Zamolio je da se poslanici udalje od pravne nadležnosti onih kojih se to tiče. Da je to bilo potrebno neko od međunarodne zajednice tražio bi od Predstavničkog doma da se izjasni, rekao je, između ostalog, Tihomir Gligorić.

Senad Šargović je zatražio pauzu da se umnoži Prijedlog rezolucije koji on ima u rukopisu. Međutim, za pauzu nije bilo raspoloženja, pa je on pročitao sljedeći Prijedlog rezolucije:

1. Odluka Ustavnog suda BiH o konstitutivnosti naroda na području cijele BiH mora se sprovesti i usaglasiti od strane entitetskih parlamenata.
2. Obavezuju se državni organi BiH, Predsjedništvo BiH, Vijeće ministara BiH i Kolegij Predstavničkog doma, da se maksimalno angažuju na implementaciji Odluke Ustavnog suda BiH u entitetskim parlamentima zajedno sa predsjednicima entiteta, entitetskih vlada i kolegija skupština entiteta.

Željko Mirjanić je rekao da ima zvanično tumačenje OHR-a da stavovi entitetskih skupština ne obavezuju poslanike Predstavničkog doma. Prema tome, ni ovaj dom ne može obavezivati entitetske skupštine.

Mariofil Ljubić je u kratkoj diskusiji rekao da je Dom večeras doveden u jednu situaciju da sve što se raspravlja nema nikakve forme, nikakve težine – sve je diskutabilno. Ali ako nešto treba usvojiti, predložio je da to bude konstatacija da je Odluka Ustavnog suda obavezujuća i da Dom traži od entitetskih parlamenata da je provede.

Na tragu Ljubićevog prijedloga, nakon kraćih diskusija Mirjanića i Ljubića, Predstavnički dom je usvojio sljedeći

ZAKLJUČAK

Odluka Ustavnog suda Bosne i Hercegovine o konstitutivnosti naroda na cijeloj teritoriji Bosne i Hercegovine je konačna i obavezujuća.

Predstavnički dom poziva entitetske parlamente da dosljedno provedu Odluku Ustavnog suda Bosne i Hercegovine.

ZA zaključak je glasalo 25, protiv 3, suzdržao se jedan poslanik. Po entitetima, iz Federacije BiH ZA je glasalo 20, iz Republike Srpske 5 poslanika.

Na kraju sjednice predsjedavajući Željko Mirjanić obavjestio je poslanike da će, u skladu s Poslovnikom, u Kolegiju biti izvršena rotacija na mjestu predsjedavajućeg i da će narednu sjednicu pripremati gospodin Mariofil Ljubić.

Sjednica je završena u 19,50 sati.

Sastavni dio ovog zapisnika je transkript 24. sjednice Predstavničkog doma.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Željko Mirjanić